



9. august 2012

UKA 2013/74

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inunnik najugaqarfigineqartuni aallaasersornerit Kalaallit Nunaani pinerluttulerinermik inatsisip ataani inissisimalersinneqarnissaat, tamatumani inatsisit unioqqutinneqarnerini pineqaatissiisalernissat aammalu aallasersornermi aallaasit atorneqartut arsaarinnissutigineqartalernissaanik Naalakkersuisut Danmarkip Naalagaaffianik isumaqatiginninniarnissamik aallarniinnaat Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasorta q Jens B. Frederiksen, Demokraatit)

Tungavilersuut

Illoqarfinni nunaqarfinnilu inunnik najugaqarfigineqartuni inunnik aallaasersorsimasunik politiit tigusarinnissimatillugit arlalitsigut kingunerisarpaa aqaguani akiligassiisitsoqartarnera tigusarineqarsimasunillu iperaaneq. Pinerluttulerinermik inatsisit tungavigalugit toqutseriarsimanermik imaluunniit navianartunik passussisisoqarsimanera peqqutigalugit inunnik allanik navianartorsior-titsisisoqarsimaneranik unioqqutitsisoqarsimanera politiit uppernarsaatissanik takussutissaqanngikkaangata taama pisoqartarpoq.

Arlalitsigullu unnerluussisut sumut aallaariartoqarsimanera uppernarsarsinnaaneq ajorpaat aallaariartoqarsimasorli kisiat uppernarsinnaasarlugu. Taama pisoqartillugu politiit peqqussutaanik unioqqutitsisimasutut pineqartut pasineqartarput taamalu pisoqartillugu akiligassiisoqarnissaa kisimi periarfissaasarpoq.

Inunnik najugaqarfigineqartunit ungasissusermik aalajangersimasumik ungasitsigisumiit inuusuttut allaluunniit aallaasinik nakersaaniarnerinut atatillugu annerusumillu minnerusumilluunniit aallaasersornerit navianartorsior-titsinngitsuni politiit peqqussutaani tunaartarineqartut Demokraatit isumaqarput.

Imigassartorsimanerup kingunerisaanik inuit aqussinnaangisaminnik kamarujussuarnerisa kingunerisaanik aallaasersornerit sumut tamaangalu eqqaassisarneri ukiumut arlaleriarluni Kalaallit Nunatsinni pisartoq pillugu taamalu pisoqarnissaata pinaveersimatinniarneraluunniit anguniarlugu peqqussut pineqartoq suliarineqarsimanaviangilluinnarpoq.

Aallaasersornerit taaneqartut pigaangata pisoqarfimmi annilaanganerit annertoorujussuit pilersarput, sumiiffinnilu toqqissisimanginnermik kinguneqartarluni. Tamatumalu saniatigut politiit sulinerminni nukiit annertoqisut pisoqarfimmi aqqusinernik matusinernut aammalu pinerluttuliortup aallaasersorunnaarsinneqarnissaa anguniarlugu iliuuseqarnernut nukippassuit atortarpaat.

Unioqqutitsinerit pineqartut politiit peqqussutaaniitinnagit pinerluttulerinermili inatsisip ataaniilersinneqarnerisigut pinerluuteqartut pineqaatissinneqartalernissaanik periarfissaqartitsisoqassaaq, assersuutigalugu eqqartuussinerit pinerluuteqaqqinnerni aatsaat atuutinneqalersussatigut, Kriminalforsorgimit nakkutiginqarluni imigassamik ajornartorsiuteqarnermik katsorsartinnissat piumasaqaatigineqarneri pinerluutillu sakkortuut uteqqinneqarnerisa kingorna parnaarussaasinissat pineqaatissiissutigineqalersinnaassapput. Pinerluuteqartut sakkuinik arsaarinnissinnaalernerit aammattaaq periarfissinneqassapput.

Demokraatinit soorunami eqqumaffigineqarpoq imigassartorsimanerup kingunerisaanik aammalu sakkortuumik misiginerit kingunerisaanik unioqqutitsinerit pisartut, inuiaqatigiilli ersarissumik takutittariaqarpaat pissusilersornerit pineqartut akuersaarneqarsinnaanngitsut.

Pisortanut aningaasatigut allaffissornikkullu kingunissai

Siunnersuut Kalaallit Nunaanni Namminersorlutik Oqartussanut aningaasartuuteqartitsissanngilaq aamma allaffissornikkut nukiit suliamut illuartinneqartussat ilinniagartuup ukiup sisamararterutaani suliarisartagaanit annertunerunissaat naatsorsuutigineqanngilaq.